

## **Adroddiad Adran 6 - Y ddyletswydd bioamrywiaeth a chydnerthedd ecosystemau<sup>1</sup> - Cwestiynau cyffredin**

### **Pam mae'n rhaid ysgrifennu adroddiad ar ddyletswydd adran 6 ynghylch bioamrywiaeth?**

O dan adran 6(7) Deddf yr Amgylchedd (Cymru), rhaid i bob awdurdod cyhoeddus gyhoeddi adroddiad ar yr hyn y mae wedi'i wneud i gydymffurfio â dyletswydd adran 6, hynny cyn diwedd 2019 a chyn diwedd bob trydedd flwyddyn ar ôl 2019. Bydd adroddiad adran 6 yn sicrhau bod yr awdurdod lleol yn agored ac yn atebol o ran ei ddyletswydd adran 6 a gallai fod yn gyfrwng defnyddiol ar gyfer cyfathrebu â rhanddeiliaid, y gymuned a grwpiau busnes. Bydd yn sylfaen hefyd i'r awdurdod cyhoeddus adolygu ei weithgareddau adran 6 a bydd yr holl adroddiadau a gynhyrchir ledled Cymru'n sail ar gyfer gwerthuso'r ddyletswydd adran 6 ar lefel Cymru gyfan.

### **Sut dylwn ni sgrifennu'r adroddiad?**

Ni ddylai'r gwaith o sgrifennu'r adroddiad fod yn feichus a dylai gyfateb i faint a natur eich sefydliad, o ran y gweithgareddau bioamrywiaeth y mae'n ei gynnal. Rydym yn annog sefydliadau i ddewis eu hunain sut i baratoi'r adroddiad. Yn ddelfrydol, dylai fod yn rhan o'u mecanweithiau adrodd arferol. Er enghraifft, gall yr adroddiad fod yn rhan o adroddiad blynyddol neu'n atodiad iddo, neu'n atodiad neu'n ddiweddariad o gynllun adran 6, neu gallai fod yn adroddiad ar wahân. Yr unig raid yw ei fod yn cael ei gyhoeddi.

### **Pryd a ble y dylai'r adroddiad gael ei gyhoeddi?**

Dywed isadran 7 y dylai'r adroddiad cynta gael ei gyhoeddi cyn diwedd 2019. Ond ar gyfer y cylch adrodd cynta, er mwyn alinio'r adroddiad â'ch cylchoedd corfforaethol, gallech gyhoeddi adroddiad byr erbyn y dyddiad hwnnw a chyhoeddi'r adroddiad llawn wedi hynny fel rhan, dyweder, o'ch adroddiad blynyddol neu'r adroddiad llesiant.

Dylai'r adroddiad fod yn hawdd cael gafael arno - o ddewis felly dylech ei gyhoeddi ar-lein. Anfonwch ddolen ato i'r blwch postio isod ar ôl ichi ei gyhoeddi.

### **Beth ddylai fod yn yr adroddiad?**

Er ein bod yn annog sefydliadau i gyhoeddi'u hadroddiad mewn ffordd sy'n gyfleus iddyn nhw, mae [arweiniad](#) wedi'i baratoi i ddweud beth ddylai'r adroddiad ei gynnwys. Mae'r arweiniad yn hyblyg ond bydd hefyd yn sicrhau peth cysondeb, pan fydd angen gwerthuso holl adroddiadau dyletswydd adran 6 i gyd gyda'i gilydd.

Awgrymir eich bod yn cynnwys y canlynol: cyflwyniad i'r awdurdod cyhoeddus a'i swyddogaethau a'i drefniadau llywodraethu o ran bioamrywiaeth; adroddiad ar yr hyn sydd wedi'i wneud, ac alinio hynny â'r chwe nod yng [Nghynllun Adfer Natur Cymru](#); a'r uchelbwyntiau, y prif ganlyniadau i fioamrywiaeth, y problemau a'r rhwystrau a gafwyd.

---

<sup>1</sup>Cewch fwy o fanylion am ddyletswydd adran 6 yn y fan [yma](#).

Rhaid i awdurdod cyhoeddus sydd wedi cyhoeddi cynllun adran 6 adolygu'r cynllun yng ngoleuni pob adroddiad adran 6 y mae'n ei gyhoeddi. Os cynhelir yr adolygiad cyn cyhoeddi'r adroddiad adran 6, yna gellir nodi canlyniad yr adolygiad hwnnw yn yr adroddiad.

Os ydych eisoes wedi paratoi'ch adroddiad yn y fformat sy'n well gennych, mae hynny'n iawn.

### **Pwy sy'n gyfrifol am gynhyrchu'r adroddiad?**

Y corff sy'n gwneud y penderfyniadau terfynol neu bennaeth y sefydliad e.e. y Prif Swyddog Gweithredol neu'r Bwrdd Llywodraethu, sy'n gyfrifol bod y ddyletswydd yn cael ei gwneud.

### **A gaiff yr adroddiad ei werthuso?**

O dan adran 6(8), rhaid i awdurdodau cyhoeddus sydd wedi cyhoeddi cynllun adran 6 adolygu'r cynllun hwnnw yng ngoleuni eu hadroddiad adran 6. Mater i bob awdurdod cyhoeddus yw adolygu'i adroddiad a'i gamau i weld beth sydd wedi'i wneud, beth sydd angen ei wella a sut i wella neu newid ei gynlluniau adran 6 a'i weithgarwch ar fioamrywiaeth yn y dyfodol.

Fodd bynnag, caiff gwerthusiad trwy Gymru o'r gwaith adran 6 ei gynnal ar ôl y cylch adrodd gyntaf, er mwyn sicrhau cysondeb ac i awdurdodau lleol allu dysgu oddi wrth ei gilydd, rhannu gwybodaeth a rhannu arferion da ar gyfer y dyfodol.

### **Pryd caiff y gwerthusiad ar lefel Cymru ei gynnal?**

Caiff y gwerthusiad ei gynnal ar ôl y cylch adrodd cyntaf ond bydd yn rhaid aros tan ar ôl diwedd blwyddyn ariannol 2020, er mwyn i adroddiadau llawn allu cael eu hymgorffori mewn adroddiadau blynyddol.

### **Beth fydd yn digwydd os na wnawn ni gyhoeddi adroddiad?**

Gall unrhyw un herio awdurdod cyhoeddus ynghylch ei ddyletswydd adran 6.

Mae natur yn prnhau ar raddfa na welwyd mo'i thebyg erioed yn hanes dynoliaeth, mae rhywogaethau'n diflannu'n gyflymach a bydd effeithiau difrifol hyn yn debygol bellach o daro pobl ledled y byd. Mae buddsoddi i gynnal a chyfoethogi bioamrywiaeth ac ecosystemau cydnerth yn rhoi hwb uniongyrchol i iechyd a lles tymor hir economi a phobl Cymru.

Bydd cyhoeddi'r adroddiad yn cyfrannu at y gwerthusiad Cymru gyfan o ddyletswydd adran 6 er mwyn helpu i allu gweithredu yn y dyfodol er lles bioamrywiaeth.

### **Beth os nad ydym wedi llunio cynllun adran 6 eto?**

Mae dal amser i awdurdodau cyhoeddus lunio adroddiad ar yr hyn y maent wedi'i wneud i gynnal a chyfoethogi bioamrywiaeth. Dylent geisio llunio cynllun adran 6 cyn gynted ag y medrant i gydymffurfio â'r ddyletswydd. Cewch ragor o gyngor ar ddyletswydd adran 6 yn y ddogfen [Cwestiynau Cyffredin](#) sy'n rhoi mwy o fanylion ar y ddeddfwriaeth, cynnwys cynlluniau adran 6 a sut i'w paratoi. Fe welwch ragor o wybodaeth a chyngor ar sut i gynnal a chyfoethogi bioamrywiaeth a sut i gryfhau ecosystemau ar wefan [Partneriaeth Bioamrywiaeth Cymru](#).

## **Ble mae cael help gyda'n hadroddiad adran 6?**

Dylai cynhyrchu adroddiad adran 6 fod yn rhwydd, ond os oes gennych gwestiwn, e-bostiwch [Adran.Section6@llyw.cymru](mailto:Adran.Section6@llyw.cymru) neu wefan Partneriaeth Bioamrywiaeth Cymru [yma](#).



---

Llywodraeth Cymru  
Welsh Government